



Aruba Tivoli Club a kibra record di Reinado di Carnaval na Aruba

Aruba Tivoli Club awe ta sinti su mes hopi orguyoso di ta un di e pilarnan di nos Carnaval, pero mas ainda pa ta e club cu den Carnaval 43 a bai cu dos di e tres Reinadonan, na promé lugar Jo-Ann Croes como e di 34 Reina Hubenil y ayera'nochi Cathy Arends a wordo coroná como e di 43 Reina di Carnaval di Aruba. Ta den e mesun 43 aña bieuw di nos Carnaval, Aruba Tivoli a bai den historia como e club cu un total di shete Reina di Carnaval y cinco Reina Hubenil. Ki honor mas grandi cu ta e club cu a representá e promé Reina di Aruba su Carnaval, Evelina Croes a trece no solamente e promé corona pa Tivoli, pero ta carga e promé Reinado di historia di Carnaval.

Despues di dje a sigui Burney Every na 1960, Enid Marugg tres aña despues, Dorinda Croes na 1965, e di cinco corona di Carmen Lacle na 1970, recientemente Monica Saladin na 1992 y awor Cathy Arends ta uni su mes na e Real grupo aki. Den cada undie eleccionnan atraves di e 43 añanan, e grupo di Aruba Tivoli Club a caracterizá su mes pa e gran apoyo den color corrá y nan union cu ta sigurá e lugar di nan candidata sino como ganadora, por lo menos entre e finalistanan.

E fiestanan di celebracion cada biaha cu un di nan representante gana ta famoso y ta conocí pa caba te den oranan di mardugá. Aruba Tivoli Club ta yena su mes di orguyo ora di tin e honor di habri cada parada. Nan Reinanan ta wordo recordá pa añanan largo y ta wordo tumá como ehempel di nan gran poder e y participacion continuo, luhoso y por demas éxitoso den cada un di e Carnavalnan. Mescos cu nos tin e seguridad cu Carnaval di Aruba lo tin bida largo, no tin sigur cu Aruba Tivoli Club tambe lo tey den futuro pa den cierto forma trece nos bek den pasado y demostrá nan exquisito fantasía y creatividad y mas importante con pa celebrá nos

fiesta di Carnaval den su máximo nivel.

Alegría y Fantasía den su edicion special di Carnaval ta

manda un palabra di pabien tanto na Jo-Ann Croes, Cathy Arends, Bibi Arends, tur esnan cu di un of otro forma ta

responsabel pa e éxito di cada un di e actividadnan carnavalesco di Aruba Tivoli Club y especialmente na tur e

tivolianonan cu fielmente aña tras aña ta join nan club y festehá Carnaval yen di energía y smaak.